

四庫全書

集部

欽定四庫全書

湛然居士集卷五

元 耶律楚材 撰

贈富察元帥七首

閒騎白馬思無窮
來訪西城綠髮翁
元老規模妙天下
錦城風景壓河中
花開杞欖芙蓉萼
淡酒泛葡萄琥珀濃
痛飲且圖容易醉
欲憑春夢到盧龍

其二

積年飄泊困邊塵
閒過西隅謁故人
忙喚賢姬尋器皿
更呼遼客奏箏箏
葡萄架底葡萄酒
杞欖花前杞欖仁
酒釀花繁正如許
莫教辜負錦城春

其三

主人知我怯金觴
特為先生一改堂
細切黃橙調蜜煎
重羅白餅糝糖霜
幾盤綠橘分金縷
一碗清茶點玉香
明日辭君向東去
這些風味幾時忘

其四

使君排飯宴南溪不枉從君鳥鼠西春雁旅澆濃鹿尾
臘糟微浸軟駝蹄絲絲魚膾明如玉屑屑麋腥爛似泥
白面書生知此味從今更不嗜黃齏

其五

筵前且盡主人心明燭厭厭飲夜深素袖佳人學漢舞
碧髯官妓撥胡琴輕分茶浪飛香雪旋擘橙盃破軟金
五夜歡心猶未已從教斜月下疎林

其六

主人開宴醉華胥一派絲篁沸九衢
黯紫葡萄垂馬乳輕黃杞攬燦牛酥
金波泛蟻斟歡伯雪浪浮花點酪奴
忙裏偷閒誰若此西行萬里亦良圖

其七

閒來羸馬過蒲華又到西陽太守家
瑪瑙瓶中簪亂錦琉璃鍾裏泛流霞
品嘗春色批金橘受用秋香割木瓜
此日幽歡非易得何妨終老住流沙

庚辰西域清明

清明時節過邊城遠客臨風幾許情
野鳥問關難解語
山花爛漫不知名
蒲萄酒熟愁腸亂
瑪瑙盃寒醉眼明
遙想故園今好在
梨花深院鷓鴣聲

用鹽政姚德寬韻

乃祖開元柱石臣
雲孫髣髴玉麒麟
從來德炙輿人口
此日恩霑聖世春
欲艸薦書學北海
未開東閣媿平津
而今且試調羹手
佇看沙堤繼舊塵

用照禪師韻

銀鈎全似趙周臣詩比黃華格調新道眼點開言外句
禪心說破劫前春山中跛挈無為客林下逍遙自在人
不犯清波垂釣處卧龍隨手出龍津

其二

聖德洋洋雨露零蟲魚草木總歡榮妖氛斂禍堯風扇
外道消聲佛日明

和薛正之見寄

賢臣聖主正時遭建策龍庭莫憚勞大壑波深翻巨鯉

高空風順遇鴻毛一番制度新才術百代文章舊雅騷
勉力自強宜不息功名何啻泰山高

乞扇

屈絢圓裁白玉盤幽人自剪素琅玕全勝織女絞綃帕
高出湘妃玳瑁斑座上清風香細細懷中明月淨團團
願祈數柄分居士顛倒陰陽九夏寒

壬午西域河中遊春十首

幽人呼我出東城信馬尋芳莫問程春色未如華藏富

湖光不似道心明
土牀設饌談玄旨
石鼎烹茶唱道情
世路崎嶇太尖險
隨高逐下坦然平

其二

三年春色過邊城
萍跡東歸未有程
細細和風紅杏落
涓涓流水碧湖明
花林啜茗添幽興
綠野觀耕稱野情
何日要荒同入貢
普天鐘鼓樂清平

其三

春雁樓邊三兩聲
東天回首望歸程
山青水碧傷心切

李白桃紅照眼明幾樹綠楊搖客恨一川芳艸惹羈情
天兵幾日歸東闕萬國歡聲賀太平

其四

河中二月好踏青且莫臨風嘆客程溪畔數枝繁杏淺
牆頭千點小桃明誰知西域逢佳景始信東君不世情
圓沼方池三百所澄澄春水一時平

其五

二月河中艸木青芳菲次第有期程花藏徑畔春泉碧

雲散林梢晚照明
含笑山桃還似識
相親水鳥自忘情
遐方且喜豐年兆
萬頃青青麥浪平

其六

異域春郊艸又青
故園東望遠千程
臨池嫩柳千絲碧
倚檻妖桃幾點明
丹杏笑風真有意
白雲送雨太無情
歸來不識河中道
春水潺潺滿路平

其七

四海從來皆弟兄
西行誰復嘆行程
既蒙傾蓋心相許

得遇知音眼便明金玉滿堂違素志雲霞千頃適高情
廟堂自有夔龍在安用微生措治平

其八

寓跡塵埃且樂生垂天六翮斂鵬程無緣未得風雲會
有幸能瞻日月明出處隨時全道用窮通逐勢嘆人情
憑誰為發豐城劍一掃妖氛四海平

其九

不如歸去樂餘齡百歲光陰有幾程文史三冬輸曼倩

田園二頃憶淵明賓朋冷落絕交分
親戚團圓說話情
植杖耘耔聊自適笑觀南畝綠雲平

其十

襄翁老矣倦功名繁簡行軍笑李程
牛糞火熟石坑煖
蛾連紙破瓦窗明水中漉月消三毒火
裏生蓮屏六情
野老不知天子力謳歌鼓腹慶昇平

遊河中西園和王君玉韻四首

萬里東皇不失期園林春老我來遲
漫天柳絮將飛日

遍地梨花半謝時異域風光特秀麗幽人佳句自清奇
臨風暢飲題玄語方信無為無不為

其二

清明出郭赴幽期千里江山麗日遲花葉不飛風定後
香塵微斂雨餘時彫鐫冰玉詩尤健揮掃龍蛇字愈奇
好字好詩我獨得不來賡和擬胡為

其三

異域逢君本不期湛然深恨識君遲清詩厭世光千古

逸筆驚人自一時字老本來遵雅淡吟成元不尚新奇
出倫詩筆服君妙笑我區區亦強為

其四

風雲佳遇未能期自是魚龍上釣遲
宮穴潛藏難遯世塵囂俯仰且隨時
百年富貴真堪嘆半紙功名未足奇
伴我琴書聊自適生涯此外更何為

河中遊西園四首

河中春晚我邀賓詩滿雲牋酒滿巡
對景怕看紅日暮

臨池羞照白頭新
柳添翠色侵凌艸
花落餘香著莫人
且著新詩與芳酒
西園佳處送殘春

其二

河中風物出乎倫
閒命金蘭玉笋巡
半笑梨花瓊臉嫩
輕顰楊柳翠眉新
銜泥紫燕先迎客
偷藥黃蜂遠趁人
日日西園尋勝槩
莫教辜負客城春

其三

幾年萍梗困邊城
閒步西園試一巡
圓沼印空明鏡瑩

芳菲藉地翠茵新
幽禽有意如留客
野卉多情解笑人
屈指知音今有幾
與誰同享瓮頭春

其四

金鼓鑾輿出隴秦
驅馳八駿又西巡
千年際會風雲合
一代規模宇宙新
西域兵來擒偽主
東山詔下起幽人
股肱元首明良世
高拱垂衣壽萬春

河中春遊有感五首

西河

沁斯幹有西戎索
哩單故宮在焉

構室未全終
又見頽垣遶故壙

綠苑連延花萬樹碧堤回曲水千重不圖舌鼓談非馬
甘分躬耕學卧龍糲食麕衣聊自足登高舒嘯樂吾慵
其二

異域河中春欲終園林深密鎖頽墉東山雨過空青疊
西苑花殘亂翠重杞欒碧枝初着子葡萄綠架已纏龍
等閒春晚芳菲歇葉底翩翩困蝶慵

其三

坎止流行以待終幽人射隼上高墉窮通世路元多事

難險機關有幾重百尺蒼枝藏病鶴三冬蟄窟閉潛龍
琴書更結忘言友治圃耘蔬自養慵

其四

西域渠魁運已終天兵所指破金墉崇朝駟騎馳千里
一夜捷書奏九重鞭策不須施犬馬廟堂良筭足夔龍
北窗高卧薰風裏儘任他人笑我慵

其五

重玄叩擊數年終大道難窺萬仞墉舊信不來青鳥遠

故山猶憶白雲重自知勲業輸雛鳳且學心神似老龍
忙裏偷閒誰似我兵戈橫蕩得疎慵

過閭居河四首

河水春盡水無聲靠岸釣魚羨擊冰乍遠南州如夢蝶
暫遊北海若飛鵬隨堤柳絮風何處越嶺梅花信莫憑
試暫停鞭望西北迎風羸馬不堪乘

其二

北方寒凜古來稱親見陰山凍鼠冰戰鬪簷楹翻鐵馬

窮通甚勢變金鵬五車經史都無用一鶚書章誰可憑
安得衝天暢予志雲輿六馭信風乘

其三

一聖龍飛德足稱其亡凜凜涉春冰千山風烈來從虎
萬里雲垂看舉鵬堯舜徽猷無闕失良平妙筭足依憑
華夷一混非多日浮海長桴未可乘

其四

自愧聲名無可稱賢愚混世炭和冰竊鹽倉鼠初成蝠

噴浪溟鯤未化鵬
賣劍學耕食粗遣
買山歸老價難憑
秋江月滿西風軟
何日扁舟獨自乘

感事四首

富貴榮華若聚漚
浮生渾如水東流
仁人命短嗟顏氏
君子懷疾嘆伯牛
未得鳴珂遊帝闕
何能騎鶴上揚州
幾時擺脫閒韁鎖
笑傲烟霞永自由

其二

當年元擬得封侯
一誤儒冠入士流
赫赫鳳鸞捐腐鼠

區區蠻觸戰蝸牛未能離欲超三界必用麾旄混九州
致主澤民元素志陳書自薦我無由

其三

得不欣欣失不憂依然不改舊風流深藏鳳壁無投鼠
好蓄龍泉候買牛山寺幽居思少室梅花歸夢遶揚州
萱堂溫清十年闕負米供親愧仲由

其四

人不知予我不尤濯纓何必揀清流良材未試聊耽酒

利器深藏侯割牛，舊政欲傳新令尹。
新朝不識舊荊州，眉山云邁歸商路。
痛怗新詩寄子由。

壬午元旦二首

西域風光換東方，音問疎屠蘇。
聊復飲鬱壘，不須書舊歲。
昨宵盡新年，此日初客中。
今十載孀母，信何如。

其二

萬里西征出玉關，詩無佳思酒瓶乾。
蕭條異域年初換，坎軻窮途臘已殘。
身過碧雲遊極樂，手遮東日望長安。

年光迅速如流水不管詩人兩鬢斑

過沁園有感

昔年曾賞沁園春今日重來迹已陳
水外無心修竹古雪中含恨瘦梅新
垣頽月榭經兵火艸沒詩碑覆劫塵
羞對覃懷昔時月多情依舊照行人

用劉正叔韻

參叩松軒積有年光塵融洩一愚賢
視民每羨如蜀狗治國常思烹小鮮
只道牛邊休執杖誰知琴上亦忘絃

湛然稍異香山老不學空門不學仙

西域家人輩釀酒戲書屋壁

西來萬里尚騎驢旋借葡萄釀綠醕司馬捲衣親滌器
文君挽袖自當壚元知沽酒業緣重何奈調羹手段無
古昔英雄初未遇生涯或亦隱屠沽

西域從王君玉乞茶因其韻七首

積年不啜建溪茶心竅黃塵塞五車碧玉甌中思雪浪
黃金碾畔憶雷芽盧仝七碗詩難得諗老三甌夢亦賒

敢乞君侯分數餅暫教清興遶煙霞

其二

厚意江洪絕品茶先生分出蒲輪車
雪花灑灑浮金蘂玉屑紛紛碎白芽
破夢一杯非易得搜腸三椀不能賒
瓊甌啜罷酬平昔飽看西山插翠霞

其三

高人惠我嶺南茶爛賞飛花雪滿車

是日作茶
曾值雪

玉屑三

甌烹嫩蘂青旗一葉碾新芽頓令衰叟詩魂爽便覺紅

塵客夢賒兩腋清風生坐榻幽歡遠勝泛流霞

其四

酒仙飄逸不知茶可笑流涎見麪車玉杵和雲春素月
金刀帶雨剪黃芽試將綺語求茶飲特勝青衫把酒賒
啜罷神清淡無寐塵囂身世便雲霞

其五

長笑劉伶不識茶胡為買鍤漫隨車蕭蕭暮雨雲千頃
隱隱春雷玉一芽建郡深甌吳地遠金山佳水楚江賒

紅爐石鼎烹團月一椀和香吸碧霞

其六

枯腸搜盡數杯茶千卷胸中到幾車
湯響松風三昧手雪香雷震一槍芽
滿囊垂賜情何厚萬里攜來路更賒
清興無涯騰八表騎鯨踏破赤城霞

其七

啜罷江南一椀茶枯腸歷歷走雷車
黃金小碾飛瓊屑碧玉深甌點雪芽
筆陣陳兵詩思勇睡魔卷甲夢魂賒

精神爽逸無餘事卧看殘陽補斷霞

和冲霄韻五首

垂亡聖道賴君鳴坎軻休嗟道不行須信詩魔降筆陣
好將酒戰破愁城滔滔秋水如人志薄薄閒雲似世情
一舉冲霄知有日垂天萬里看鵬程

其二

古今興廢不堪聽寵辱都如夢一驚韜略欣然推後進
琴書足以了餘生既知物物頭頭是誰問朝朝暮暮情

散盡迷雲何所有一輪秋月普天明

其三

天涯索寞正窮秋
衰艸寒煙無盡頭
葉底哀蛩空促織
雲間征雁祇供愁
酪漿滿引澆羊胛
糲食隨緣薦鹿脩
試暫迴光樂真覺
人間萬法一時收

祇供愁一作漫書愁

其四

星星華髮鏡中驚
好賦歸與接浙行
位重寧貪高一品
故園無憚遠千程
晴天花絡春山色
落日松和秋水聲

無恙閭峰三百寺遨遊吟嘯老餘生

其五

古木殘陽映矮岡雁行天際寫秋光
霜蓑帶雨添愁色晚菊和風送冷香
濁酒三年渾未試黃糧九月得初嘗
龍沙且喜身强健南望幽人天一方

又一首

不見高陽舊酒徒臨風惆悵幾踟躕
無窮真味思焦尾有限浮生嘆白駒
德望服人輸二陸文章重世媿三蘇

散材潦倒渾無用空作昂藏一丈夫

和冲霄十月桃花韻二首

桃源仙子憶劉郎不憚嚴冬雨雪涼紅雨已先初夏落
妖魂重對小春芳冷侵絳萼剛舒臉寒徹朱衣強噴香
誰向荒園慰蕭索數枝無語映斜陽

其二

春生秋殺乃天常來往推遷炎與涼晚節正當陰氣塞
窮冬忽見小桃芳豈知木棗能成實僭與江梅敢並香

自媿備員調鼎鼎不知何事謬陰陽

用薛正之韻

無德慚為天下先湖山歸計好加鞭
霜深尚有籬邊菊風勁全無葉底蟬
三弄瑤琴歌素月一尊濁酒醉蒼煙
鳳池分付夔龍去萬頃瀟湘屬湛然

湛然居士集卷五

欽定四庫全書

湛然居士集卷六

元 耶律楚材 撰

和景賢見寄

龍岡參透後三三髣髴前人何所慚
妙筆照人驚老字新詩入手想清談
塵中名利予難出夢裏榮華君不耽
准擬歸時便歸去閭山珍重舊禪菴

珍重一作好在

用劉潤之乞冠韻

隱逸養幽慵飄蕭兩鬢蓬
角巾折暮雨醉帽落秋風
避暑掛石上銜杯澆酒中
忘機任真率露頂向王公

西域河中十詠

寂寞河中府連甍及萬家
葡萄親釀酒杞欖看開花
飽噉雞舌肉分飡馬首瓜
土產瓜大如馬首人生唯問腹何礙
過流沙

其二

寂寞河中府臨流結艸廬
開尊傾美酒擲網得新魚
有

客同聯句無人獨看書天涯獲此樂終老又何如

其三

寂寞河中府遐荒僻一隅葡萄垂馬乳杞欖燦牛酥釀
酒無輸課耕田不納租西行萬餘里誰謂乃良圖

其四

寂寞河中府生民屢有災避兵開邃穴防水築高臺六
月常無雨三冬却有雷偶思禪伯語不覺笑顏開

其五

寂寞河中府，頽垣遶故城。
園林無盡處，花木不知名。
南岸獨垂釣，西疇自省耕。
為人但知足，何處不安生。

其六

寂寞河中府，西流綠水傾。
衝風磨舊麥，

西人作磨風動機軸以磨麥

懸碓杵新粳。

西人皆懸杵以舂

春月花渾謝，冬天艸再生。
優游

聊卒歲，更不望歸程。

其七

寂寞河中府，清歡且自尋。
麻牋聊寫字，筆筆亦供吟。
傘

柄學鑽笛宮門自斷琴臨風時適意不負昔年心

得故宮門

堅木三尺許斷
為琴有清聲

其八

寂寞河中府西來亦偶然每春忘舊閨隨月出新年強

策渾心竹難穿無眼錢異同何定據俯仰且隨緣

西人不計

閨以十二月為歲有渾心
竹其金銅芽錢無孔郭

其九

寂寞河中府聲名昔日聞城隍連畝畝市井半丘墳食

飯秤斤賣金銀用麥分生民怨來後簞食謁吾君

其十

寂寞河中府遺民自足糧黃橙調蜜煎白餅糝糖霜漱
旱河為雨無衣攏種羊一從西到此更不憶吾鄉

西域和王君玉詩二十首

年來深欲買湖山貧病難酬絹五千歸去不從陶令請
知音未遇孟嘗賢排愁器具思歡伯送老生涯乏貨泉
惟有詩魂常伴我閒吟陶寫箇中玄

其二

一髮燕然曉日邊
寒雲疊疊亂山千
萬里沙漠猶逢友
十室荒村亦有賢
留客芳尊思北海
驚人奇語憶南泉
思量萬事都渾錯
勉力輪鋌好叩玄

其三

君侯乘興寫佳篇
找得瓊琚價倍千
妙筆一揮能草聖
新詩獨惠過稱賢
半餅濁酒斟瓊笋
七椀清茶泛玉泉
萬里西行真我幸
逢君時復一談玄

其四

健美金鞍美少年
盈門劍客列三千
須知執德元非德
況是無賢敢自賢
不解彎弓射石虎
誰能擊劍躍飛泉
黑頭勲業今何在
壯歲功成愧謝玄

其五

雲龍相感本乎天
會合君臣歲一千
西伯已亡誰老老
卜商何在肯賢賢
鵷鷺未必輕滄鼠
蚯蚓猶知下飲泉
巧拙是非無定據
到頭誰解辨黃玄

其六

奔走紅塵積有年，深思雪澗竹竿千。
誰能世上全三樂，好向林間伴七賢。
筆下風生詩似錦，瓮頭春漲酒如泉。
詩成酒罷寂無事，靜几明窗誦太玄。

其七

竹徑風來自破禪，脩篁青劍葉垂千。
爛吟風月元無礙，高卧煙霞未是賢。
迷處無由逃絆鎖，悟來何處不林泉。
縱橫觸目皆真理，坐卧經行鳥路玄。

其八

無滅無生不論年誰誇桃結歲三千休將真宰陪司命
星莫使明星動進賢星有道不妨居閭市無心奚礙酌
貪泉何能遠遁塵翳去且向人間養素玄

其九

從他豪俊領時權指顧貔貅數百千碌碌餘生甘養拙
明明聖代豈遺賢且圖混世啜漓酒勿謂濯纓棄濁泉
莫道無為云便了有為何處不逢玄

其十

浮生瞬息度流年唐漢興亡不半千
清潔採薇輸二子英雄濟世有三賢
未能海上尋芝艸且向塵中泛醴泉
醉興陶陶略相似無何鄉裏亦通玄

十一

成敗興亡事可憐勞生攘攘幾千千
調心莫若先離欲治世無如不尚賢
小楮豈能懷大器短繩那得汲深泉
直須箭透威音外不用無為不用玄

十二

得得清歡樂自然不辭去國客程千翻騰舊案因君玉
唱和新詩有景賢每遇開尊邀素月常因盟手掬寒泉
襄翁自揣何多幸未死中間樂此玄

十三

驚回午枕不成眠幽鳥關關近數千安世不知安世計
隱居常慕隱居賢幾行石榻圍松徑一簇茅齋繞澗泉
掛起西軒風似水閒將犧易索幽玄

十四

農隱生涯樂自天
藥畦香壠僅盈千
蠅營累世真堪美
狗苟勞生未若賢
帶月扶犁耕暮野
衝雲荷插撥春泉
耘耔餘暇蓬窗底
獨抱遺經考至玄

十五

閒閒箇事本明圓
一念纔興路八千
生死既知皆是幻
功名猶戀豈能賢
興來暢飲斟晴月
醉後高歌枕碧泉
觸處逢渠何所礙
不玄玄處却玄玄

十六

物物頭頭總是禪
觀音應現化身千
杜門宴坐無傷道
遜世幽居也是賢
祇為看山開翠竹
偶因煎茗汲清泉
靈雲點檢真堪笑
不見桃花不悟玄

十七

蓑衣狂脫暮江邊
一醉寧論價十千
老矣馮唐何所往
歸與陶令最為賢
靈苗細細初盈圃
春水涓涓漸滿泉
酒醒夢迴無箇事
澄心忘慮醴三玄

十八

九重闔闔列羣官
曳珮鳴珂及萬千
雲水偷將屬野叟
功名迴施與時賢
好憑定慧超三界
不戀輪迴沒九泉
迅速光陰莫虛度
迴光返照靜參玄

十九

不學經書不說禪
誰論芥子納三千
忘形詩句追先覺
適意琴書慕昔賢
白雪陽春吟雅調
高山流水奏鳴泉
于時受用元無盡
參透真空未是玄

二十

鮪生詩僻慕詩仙

謂君玉也

亂綴狂吟數百千淺陋妄言嗤

後哲清新綺語媿先賢摧殘吟鬢星星髮傾倒詞源渾
渾泉韻險言窮無可說祇憑此句露深玄

和楊彥廣韻

三臺須要趁琵琶知己相逢兩會家雕斲勿傷石內玉
縱橫須放火中花探玄渾似三盃酒清興何消七椀茶
誰識湛然端的處差徭隨分納些些

題平陽李君實此君軒

環榻森森蔭好涼
此君風味詎能忘
虛心悄悄生來勁
直節亭亭老更剛
雖與蓬蒿均雨露
本同松菊傲風霜
主人雅志元堪尚
物以羣分類以方

西域有感

落日城頭鴉亂啼
秋風原上馬頻嘶
雁行南去瀟湘北
萍跡東來鳥鼠西
百尺棟梁誰着價
三春桃李自成蹊
功名到底成何事
爛飲玻璃醉似泥

早行

馬駝殘夢過寒塘低轉銀河夜已央
雁跡印開沙岸月馬蹄踏破板橋霜
湯寒卯酒兩三盞引睡新詩四五章
古道遲遲四十里千山清曉日蒼涼

自叙

信流乘坎過西天鉢裏吞針亦偶然
只道一花剛點額不知三子暗登肩
既來此世難逃數且應前生未了緣
俗眼見時難放過并贓陳首萬松軒

西域元日

凌晨隨分備樽罍辟瘟屠蘇飲一盃
迂叟不令書鬱壘
癡兒剛要畫鍾馗
新愁又逐東風至
舊信難隨春日來
又向邊城添一歲
天涯飄泊幾時回

西域寄中州禪老士大夫一十五首

恨離

闕

師太早淘汰未精起孺慕之念作是詩以

寄之

吾師道化震清都
奔逸絕塵我不如
近日虛傳三島信

幾年不得萬松書宗門淘汰猶嫌少習氣薰蒸尚未除
惆悵天涯淪落客臨風不是憶鱸魚

蒲華城夢萬松老人

辛巳閏月蒲華城夢萬松老人法語諄諄覺而猶
見其髣髴作詩以寄

華亭髣髴舊時舟又見吾師釣直鉤只道夢中重作夢
不知愁底更添愁曾參活句垂青眼未得生侯已白頭
撇下塵囂歸去好誰能騎鶴上揚州

寄巨川宣撫

巨川宣撫文武兼資詞翰俱妙陰陽歷數無所
不通嘗舉法界觀序云此宗門之捷徑也今觀
瑞應鶴詩巨川首唱焉嘆其多能作是詩以美
之

歷數興亡掌上看提兵一戰領清官馬前草詔珠璣潤
紙上揮毫風雨寒昔日談禪明法界而今崇道倡香壇
諸行百務君都占潦倒鰕生何處安

寄南塘老人張子真

張侯風味詎能忘黃米曾令我一嘗

昔予馳驛至漁陽道過南塘子真召

予一設黃飯

抵死解官違北闕達生遯世釣南塘知來何假

靈龜兆

昔論氣運頗知未來事

作賦能陳瑞鶴祥豈是西邊無土

物不知詩句寄東陽

觀瑞鶴詩卷獨子進治書無詩

丁年蘭省識君初緩步鳴珂遊帝都象簡嘗陪天仗立
王驄曾使禁臣趨只貪殢酒長安市不肯題詩瑞應圖

我念李侯端的意大都好事不如無

寄德明

德明

闕

寓燕作詩欲自絕且云但得為一飽

死鬼足矣士大夫憐之其詩末句有云功名
拍手笑殺人四十八年如一夢予每愛此兩
句近觀彌勒下生賦德明所作也因作詩以
寄之

英雄志節未凌雲尚自飄零故國塵有道且同麋鹿友

談玄能說虎狼仁幸然不作飽死鬼可惜空吟笑殺人

彌勒下生何太早莫隨邪見說無因

楞迦經第十卷云未來世有人噉糠

憑癡種無因而非見破壞世間人故有是句

才卿外郎五年止惠一書

五年只得一書題路遠山長夢亦迷睡老黑甜酣順北

公詩中自云耽睡老有燕南順北之句

冷官清淡泊遼西

遼西故都之西也

羨人

得志能如虎笑我乏材粗傲鷄佇看天兵旋北闕從今

不用玉關泥

寄清谿居士秀玉

鷓鴣猶欠一枝栖不得
燕山半土犁時復有琴歌
碧玉年來無夢遶清谿
數行文字聊遮眼半紙功名若噬臍
回首故人今健否餘生甘老碧雲西

戲秀玉

辱書聞秀玉油房蕭索馬溺衛死田畝水災
不勝感歎清谿達士豈芥蒂胸中邪因作詩
以戲之

清谿掀到打油房五衛凋零三徑荒未信塞翁嗟失馬
須知禦寇覓亡羊東湖菡萏從君賞西域葡萄輸我嘗
各在天涯會何日臨風休忘老髯郎

清谿嘗戲呼
子為髯郎

寄張子聞

憶昔攜琴論太玄

渠通太
玄經

湛然初識子聞賢迴頭葱嶺

仍千里分手松軒已五年

嘗會萬松
老人丈室

東望盧龍傾玉表

西來青鳥闕金牋幾時重會燕山道一曲臨風奏水仙

子彈水仙

公嘗學之

寄用之侍郎

用之侍郎攜書誠以無忘孔子之教予
謂窮理盡性莫尚佛乘濟世安民無如
孔教用我則行宣尼之常道舍我則樂
釋氏之真如何為不可也因作詩以見
意云

蓬萊憐我寄芳牋勸我無忘仁義先幾句良言甜似
蜜數行溫語暖于綿從來誰識龜毛拂到底難調膠

柱絃用我必行周孔教舍予不負萬松軒

和正卿待制韻

布袖龍鍾兩眼塵丹誠如舊白頭新暮雲西畔猶懷漢
曉日東邊纔是秦酒賤不妨連夜醉花鰓長發四時春
花鰓酒賤無佳思誰念天涯萬里人

寄仲文尚書

知仲文尚書役老而歸嘆其清高作詩以寄

仲文曾作黑頭公輔弼明時播美風治粟貨泉流冀北

提刑姦跡屏膠東笑觀桃李新恩徧拜掃松楸老計終
西域故人增喜色萬全良策不謀同

雪軒老人邦傑久不惠書作詩怨之

當時傾蓋便忘年別後春風五度遷萬里西行愁似海
千山東望遠如天不聞舊信傳梅嶺試道新詩怨雪軒
更上危樓一迴首朝雲深處是燕然

謝王清甫惠書

西征萬里扈鑾輿高閣文章束石渠只道昔年周夢蝶

却疑今日我為魚一簪華髮垂垂老兩眼黃塵事事疎
多謝貴人憐遠客東風時有寄來書

思親二首

孀母琴書老自娛吾山側近結蘧廬鬢邊尚結辟兵髮
昔予從征太夫人以髮少許賜予云俗傳父母之髮戴之可辟五兵今尚存焉 篋內猶存教子書
幼稚已能學土梗老兄猶未憶鱸魚誰知萬里思歸夢
夜夜隨風到故居

其二

昔年不肯卧茅廬贏得飄蕭兩鬢疎
醉裏莫知身似蝶夢中不覺我為魚
故園屈指八千里老母行年六十餘
何日掛冠辭富貴少陵佳處卜新居

思母用舊韻二首

前年驛騎過西陲聞道萱堂鬢已絲
琴斷五絃忘舊譜菊荒三徑負疎籬
筵前戲笑知何日膝下嬉遊看幾時
欲附一書無處寄愁邊空詠滿囊詩

其二

天涯唯仗夢魂歸破夢春風透客幃燈下幾時哦麗句
太夫人昔有詩云挑燈教子
哦新句冷淡生涯樂有餘筵前何日舞斑衣垂垂塞
北行人老得得江南遠信稀回首故園千萬里倚樓空
望白雲飛

思親有感

骨肉星分天一涯萱堂何處憶孤兒排愁正賴無聲樂
遣興學吟有眼詩麗句日逐三上爾香膠時復一中之
年前漢使來西域笑我星星兩鬢絲

再過西域山城驛

庚辰之冬馳驛西域過山城驛中辛巳暮冬再過
題其驛壁

去年馳傳暮城東夜宿蕭條古驛中別後尚存柴戶棘
重來猶有瓦窗蓬主人歡喜鋪毛毯驛吏蒼忙洗瓦鍾
但得微軀且強健天涯何處不相逢

辛巳閏月西域山城值雨

冷雲攜雨到山城未敢衝泥傍險行夜聽窗聲初變雪

曉窺簷溜已垂冰
泪凝孤枕三停濕
花結殘燈一半明
又向茅亭留一宿
行雲行雨本無情

十七日早行始憶昨日立春

客中為客已浹旬
歲杪西邊訪故人
杞欖花前風弄麥
葡萄架底雨沾塵
山城腸斷得窮臘
村館魂銷偶忘春
今日喚回十載夢
一盤涼餅翠蒿新

是日驛中作窮春盤

昨朝春日偶然忘
試作春盤我一嘗
木按切開銀線亂

砂瓶煮熟藕絲長勻和豌豆揉葱白

西人薰餅必投以豌豆細剪

萋蒿點韭黃也與何曾同一飽區區何必待膏粱

西域蒲華城贈富察元帥

騷人歲杪到君家土物蕭疎一餅茶
相國傳呼扶下馬將軍忙指買來車
琉璃鍾裏葡萄酒琥珀瓶中杞欖花
萬里遐荒獲此樂不妨終老在天涯

將軍乃元帥子也

乞車

君家輪扁本多能碧軾朱轅照眼明
居士此迴無馬坐

郎官不可輒徒行陳遵投轄情何厚

將行又留連數日

靈輒扶

輪報敢輕別更不須尋土物載將春色去東城

戲作二首

蒼顏太守領西陽招引詩人入醉鄉
屈朐輕衫裁鴨綠葡萄新酒泛鵝黃
歌姝窈窕髯遮口舞妓輕盈眼放光
野客乍來同見慣春風不足斷人腸

一種白葡萄酒色如金波

其二

太守多才民富强光風特不讓蘇杭
葡萄酒熟紅珠滴

橄欖花開紫雪香異域絲篁無律呂吳姬聲調自宮商
人生行樂無如此何必咨嗟憶故鄉

過太原南陽鎮題紫微觀壁三首

廷臣侍從茂前驅道侶忻奔迓使車縣吏喜聞新號令
村民爭認舊中書纍纍山果盈磁鉢薄薄濁膠半瓦壺
隱逸競詢新事跡幾時遷洛卜新都

其二

吾皇巡狩用三驅萬騎千官奉帝車北闕春頒勸農詔

南陬夜奏報捷書士民安堵耕盈野老幼迎郊漿滿壺
佇看要荒歸一統天兵不日破東都

其三

三教根源本自同愚人迷執強西東南陽笑倒知音士

反改蓮宮作道宮

紫微觀舊佛寺也村人改
佛像為道像故有是句

和松月野衲海上人見寄二詩

游子癡愚莫識家牛車遠棄愛羊車汪洋渤澥龍宮藏
涓滴波瀾坎井蛙迷後萬言猶是少悟來千里不為賒

叢林衲子空行脚遠徧天涯與海涯

其二

小隱山居何太錯居鄧大隱絕憂樂山林朝市笑呵呵
為報禪人莫動着

夢中偶得

庚辰正月夢旃檀剎澄公託萬松老人乞算籌於
予予以九十一莖贈之仍作頌一絕覺而猶憶遂
錄之為他日一笑云

昔年鈎隱索幽奇只向縱橫枝上覓而今拍手笑呵呵

九九元來九十一

仍囑附頌者云若澄公道何不云八十一汝但應云果然果然拂袖便出

覺而自着語云幾

日昏沉夢中挫五

賈非熊餞余用其韻

鑾轡和鳴車指南廷臣自愧侍龍驂平生慷慨貞夫一
萬里別離益友三老子此行無酒債故人歸計有禪菴
白雲野衲皆宗匠道眼因緣好細參

用李德恆韻

吾子棲遲尚布衣挑燈彈鋏壯歌悲阮生固已開青眼
馬氏元來有白眉運拙巢由真可慕時亨房杜不難為
男兒用舍奚憂喜三徑耕耘足自資

松月老人寄詩因用元韻

談禪講教不知家芳艸漫漫去路差杓卜虛聲禾老鼓
盤星錯認洞山麻全無去就論空色誰有心情說照遮
松月野僧須薦取釣魚人是老玄沙

湛然居士集卷六

欽定四庫全書

湛然居士集卷七

元 耶律楚材 撰

用李邦瑞韻

沉沉北海雪波深老眼增明寸碧岑未得一江活物水
何酬四海望雲心我生有過千年會自愧難為三日霖
吾子倏然虛讚德臨風羞繼謫仙吟

寄平陽淨名潤老

駟騎新從平水迴，知公無恙笑顏開。
出門不剪門庭艸，退步從生古殿苔。
玉鎖何須拴彩鳳，金鈎毋得釣黃能。
夜深織就無紋錦，但有人來寄箇來。

和鄭景賢韻

我愛龍岡老鳴琴，自老成未彈白雪曲。
先愛水仙聲，但欲合純古。誰能媚世情，林泉聊自適。
何必獻承明。

和李茂才寄景賢韻

醒時還醉，醉還醒，尚憶輪臺飲興清。
瀚海波濤，君忍聽。

天山風雪我難行
好學慷慨英雄操
母傲辛酸兒女情
但得胸中空灑灑
天涯何處不安生

除戎堂

王師西征賢帥賈公留後於雲內築除戎堂於城
之西阿以練戎事禦武折衝高出前古予道過青
塚公召予宴於是堂鴻筆大手題詩洒墨錯落於
楹棟間皆讚揚公之盛德予因作二詩以陳其梗
概云

除戎堂主震威名一掃妖氛消未萌不出戶庭成廟筭
折衝樽俎有奇兵何須公瑾長江險安用蒙恬萬里城
坐鎮大河兵偃息居延不復塞塵驚

其二

除戎廳事築城阿烽火平安師旅和遠勝長城欺李勣
徒標銅柱笑伏波服心不用七擒策禦侮何勞三箭歌
高枕幽窗無一事西人不敢牧長河

寄武川摩訶院圓明老人

臨行不暇別圓明禪客機關百變生明月清風都不會
落花流水兩無情只知嘗謁摩阿院誰道曾離歸化城
賓主相忘非聚散笑談松竹自清聲

其二

新詩入手眼增明老作機鋒太峻生略序寒溫閑禮數
過承褒賞假人情羨君奮迅超真地笑我徘徊戀化城
且喜武川歸海若狂流萬派盡消聲

其三

我愛圓明道眼明簡書時復寄鯁生談真辨忘輸達士
肯正歸邪笑世情且隱驪珠光萬丈奚貪尺璧價連城
穹廬高枕無餘事靜聽潮轟北海聲

其四

歸與不得效淵明細碎功名誤此生客裏政如閒氣味
病來猶有好心情冰絲罷品昭君曲醉墨閒題蘇武城
受用觀音法無盡悲笳風送兩三聲

其五

一扇儒風佛日明
舍生從此樂餘生
高人編簡尋長味
衲子林泉稱野情
見道穀帛充廩藏
喜聞流散集京城
自慚無德毗明主
千里虛名浪播聲

和李漢臣韻四首

夢中身世鬢垂斑
方士從誇藥駐顏
性海一波含萬象
威音雙箭透重關
圓融月水非生滅
浩渺虛舟任往還
便好灰心養愚拙
須知大智本閒閒

其二

飛龍登九五歷數與天膺休運綿瓜瓞功臣列土封但
期酬子志奚慮枕吾肱千載聖人出休嗟見有恆

其三

雲中棲隱養雄豪我愛先生一着高鼓腹詩鳴光聖世
雄文端可繼離騷

其四

龍庭十載不知疲自恨無才出六奇欲著涓埃裨海嶽
虛名閒譽畏人知

和北京張天佐見寄

寓跡龍庭積有年功名已後祖生鞭銷金衆口嫉居士
好事獨君慕湛然許遠雲山分袂別幾時風雨對床眠
瓊華贈我將何報聊寄江南古樣絃

戊子繼武川劉搏霄韻

不得吾山卧翠霞西行行遍海之涯火風地水雖非我
南北東西總是家駟騎親馳涉弱水星軺躬駕過流沙
唯期聖德漸遐邇不憚龍庭萬里賒

憩解州邵薛村洪福院

天兵南出武陽東暫解征鞍憩梵宮
玉像巍巍紅葉捧金容奕奕碧紗籠
三秦繁盛如席卷兩晉風流掃地空
唯有真如元不壞青山依舊白雲中

邵薛村道士陳公求詩

玄言聖祖五千言不說飛昇不說仙
燒藥煉丹全是妄吞霞服氣苟延年
須知三教皆同道可信重玄也是禪
趨破異端何足慕紛紛皆是野狐涎

過金山和人韻三絕

金山突起翠霞高，清賞渾如享太牢。
半夜穹廬伏枕卧，亂雲深處野猿號。

其二

金山前畔水西流，一片晴天萬里秋。
羅月團團上東嶂，翠屏高掛水晶毬。

其三

金山萬壑鬬聲清，山色空濛弄晚晴。
我愛長天漢家月，

照人依舊一輪明

謝王巨川惠臘梅因用其韻

雪裏冰枝破冷金前村籬落暗香侵
令人多謝王公子
分惠幽芳寄好音

和王巨川題武成王廟

商辛自底滅亡期
堡障全空聚繭絲
誰識華山歸馬日
易於渭水釣魚時

又用韻

不遇知音鍾子期
逢人未敢理冰絲
年來忘盡悲風操
空憶傷麟嘆鳳時

又一首

今年扈從入西秦
山色猶如昔日新
詩思遠隨秦嶺雁
征衣全染灞橋塵
含元殿壞荆榛古
花萼樓空草木春
千古興亡同一夢
夢中多少未歸人

和景賢七絕

一曲悲風和子彈
穹廬聊復助清歡
自慚未盡桐君趣

老境方知道愈難

其二

龍庭十載典南訛再品朱絃韻未和美湮千鍾聊當酒
純音三弄且充歌

其三

今日邊城又見君試彈流水熱梅魂聲和塞色金徽潤
香散穹廬玉鼎溫

其四

雅操真堪坐廟堂積年仁義佐賢王
鳴琴談笑澤天下始信斯文天不亡

其五

桐孫元採嶧陽林萬里攜來表素心
聊爾贈君為土物也教人道有知音

其六

年來衰老四旬餘願與人間萬事疎
惟有琴魔降不得

鳴球夏玉澈清虛

一作算來心地未清虛

其七

知音重遇已忘憂
況復邊山七月秋
聯句絃歌清夜樂
人生適意亦何羞

又四絕

年來世事已參商
但有聲塵尚未忘
若向琴中定優劣
龍岡錯認老髯郎

其二

撫弄桐君樂自然
寥寥古意詎能傳
伯牙點檢真堪笑

不遇知音便絕絃

其三

幽人寥落思無窮
付與軒昂一曲中
欲罷不能行且止
泣麟嗟鳳鼓悲風

其四

接得新詩想咳談
奇才獨步斗之南
縱橫風月輸君手
惟有枯禪不許參

和景賢二絕

嘗許景賢黃華墨跡景賢寄詩督予因和其韻以戲之

醉時還許醒時無諺有斯言正謂予未得素鵝白似雪
等閒難與右軍書

其二

龍岡才德古來無敏捷新詩正起予詞翰雙全妙天下
銀鈎深似魯公書

和高冲霄二首

十里東風渭水春臨風酌月弔英魂直須立事書麟閣
何必題詩寄雁門

其二

翠華南渡濟蒼生
垂老將觀德化成
昨夜行宮傳好語
秦川艸木也忻榮

過天山和上人韻二絕

從征萬里走風沙
南北東西總是家
落得胸中空索索
凝然心似白蓮花

其二

一入空門我暢哉
浮雲名利已忘懷
無心對鏡誰能識

優鉢羅花火裏開

過覃懷二絕

十年寥落隱穹廬
驛使空來好信無
再過覃懷覓陳迹
冰魂無恙影扶疎

其二

信斷江南望驛塵
十年辜負嶺頭春
而今重到覃懷地
却與梅花作主人

王屋道中

雪嶺風林渡古關
畫圖曾見晉名賢
而今好倩丹青手
添我龍鍾一湛然

過天德用遷上人韻

行盡中原二百州
黃能往往不吞鉤
而今再出天山道
收拾綸竿北海遊

贈遼西李郡王

我本東丹八葉花
先生賢祖相林牙
而今四海歸皇化
明月青天却一家

題張道人扇二首

誰裁雲扇綴春機
招引微涼枉費工
何似踏開真境界
普天匝地起清風

其二

真空境界本如如
病眼生花認畫圖
至道絕形剛著面
太虛無面更添鬚

題古井潭公秀野園

流水潛穿屋下籬
青山屋下數峰奇
佳園已有溫公句

何必裘公更寫詩

題昭上人松菊堂

晴煙蒼節出牆青
斜日黃華隔檻明
松菊尚存歸未得
湛然真箇太憨生

題平陽劉子寧玄珠堂

玄珠失却已多時
縱使離婁枉用眉
誰識這些關捩子
再三撈撋始應知

題誌公圖

昔傳難貌誌公真我道斯言尚未親
剝剝塵塵無處避丹青也是本來人

題黃山墨竹便面

黃山落筆露全機底箇團團太崛奇
點破本來真面目何妨節外更生枝

請住東堂

雲中豪俊構東堂便請禪師早發裝
自有東山鐵餒餒不妨拈出大家嘗

請倪公

倪公本是我同參道價崢嶸冠斗南千里雲山舊遊地
何妨杖錫住西菴

請照老住華塔

華塔當年隱蟄龍轟雷掣電滿雲中而今却請還山去
折脚鐺邊煮曉風

華塔照上人請為功德主

晉陽名利僅千區華塔叢林冠一隅今日請予來領略

他年乞我一禪廬

請嵩公禪師詣天德作水陸大會

禪師久住賀蘭山心與白雲自在閒便好因風到人世
化為甘露滿人間

和賈搏霄韻二絕

舉世昏昏似醉眠悲哉不肯救頭然祖師點破新關捩
直指人心教外傳

其二

西菴談道頓忘眠今日相逢亦偶然欲問瞿曇端的處
燈籠露柱却能傳

和高麗使三首

神武有為元不殺寬仁常媿數興戎仁綏武震誠無敵
重驛來王四海同

其二

揚兵青海西涼滅渡馬黃河南汴空百濟稱藩新內附
馳駟來自海門東

其三

壯年吟嘯巢由月晚節吹噓堯舜風
兩鬢蒼蒼塵滿眼
東人猶未識髯公

夢中偶得

我愛湖山好茅齋遶澗泉道人閒受用不使半文錢

和武善夫韻二首

佐主焦勞力已殫微才安可濟時艱
開樽北海希文舉
攜妓東山笑謝安
雨露新恩君責重桑榆老境我年殘

何時致政閭山去三遠依然松菊寒

其二

秋霖初霽覺新涼午夜東山月吐光翠竹無心甘晚節
黃花有意助年芳忠誠自許一心赤老境誰憐兩鬢霜
遙憶吾山歸未得故人書簡怨東陽

題寒江接舫圖

一派瀟湘萬里山間騎凍駟點江天風帆雪棹知多少
認取華亭沒底船

題黃梅出山圖

祖佛不識山中主良材可惜遭斤斧肩擔明月過前峰
一時忘却曹溪語

夢中贈聖安澄老

一束三人作一團了無前後亦無偏幾乎笑殺龐居士
擬問如何便着拳

跋定僧嵩

玉崑三尺碧玲瓏入定僧迷一色功打入無明山鬼窟

不知何日透真空

詠探春花用高冲霄韻

風拂新芳映短牆
典刑依約類丁香
梅花欲謝渠先坼
消得東君為汝忙

寄休林老人

一禪客論洞山公案渠謂洞山
果有喫棒分因作頌以寄之

世上元無真是非
叢林禪客自多疑
此詩寄向并州去
笑倒休林老古錐

過濟源登裴公亭用閒老人韻四絕

一抱青山插碧空平湖春水碧溶溶裴公亭畔千竿竹
撩我詩情得得濃

其二

珍玉參差照座寒閒閒佳句繼香山

有樂天詩碑在焉

湛然不

撥真堪笑也敢題詩列壁間

其三

繞垣喬木碧天參松竹蕭蕭翳鏡潭他日攜琴來隱此
林間乞我一禪菴

其四

碧湖風定水痕平
雪竹幽禽自好聲
我羨清源高隱士
干戈人世不知兵

再用前韻

山接晴霄水浸空
山光灑灑水溶溶
風迴一鏡揉藍淺
雨過千峰潑黛濃

其二

掀髯坐語閒臨水
仰面徐行飽看山
竹裏忽聞春雪落

天教著我畫圖間

其三

侍中菴底春山色
裴老亭邊秋水聲
修竹茂林真隱地
但期天下早休兵

其四

劫外玄機好細參
他年卜築遠澄潭
琴書活計無多子
祇與龍岡共一菴

復用前韻

水影連天天渺渺山光和水水溶溶
一林修竹搖雲碧
百畝涼陰蔽日濃

其二

門外回環皆碧水亭中坐卧得青山
凭欄晝日搜新句
思入煙霞縹緲間

其三

幾時投老謁同參擬向君王乞鏡潭
飯了遨遊容膝處

裴公亭與侍中菴

一作爛賞裴公亭畔
竹歸來容膝侍中菴

其四

四海干戈尚未平不如歸隱聽歌聲
情知文武都無用罷讀詩書不學兵

再和西菴上人韻

不在尋求不在參誰分西北與東南
雲川試入西菴去三聖元來共一菴

請真老住華塔

華塔叢林席久虛真公子請肯來
無湛然拙偈呈君去

便好攜瓶倒上驢

一作笑倒當年十萬夫

請王公住太原開化

大愚不了戾兒孫開化重興政
賴君便請踏開關
挨子何妨地炙與天薰

和薛伯通韻四絕

黃花紅葉滿秋山
月浸銀河夜未闌
寂寞梧桐深院落
有人何處倚欄干

其二

碧山粧點塞天秋老盡黃花蝶也愁拌醉東籬顛倒舞
人間富貴一何樓

其三

衰年且喜志微伸鏡裏驚看白髮新何日得遊雲水去
秋江鷗鷺淡相親

其四

虛名霸我未能歸羞見冥冥一雁飛拜掃松楸定何日
不堪雙淚對君揮

和松菊堂主人昭老見寄三詩

松菊堂中老故人
芝眉重謁我無因
林松老節應依舊
籬菊寒英又一新

其二

晉陽相遇亦前因
分手歸來迹已陳
松菊幽堂應冷淡
與君同話更何人

其三

俊老茶毗四十年前
身是我誤相傳
香山聲價喧天下

爭似衰翁不會禪

來詩謂予香山後老之後身故以此解嘲云

洞山五位頌

正中偏

十月澄江徹底冰
梅花江路破瑤英
寒齋冷坐無人寐
雪映書窗一夜明

偏中正

區區遊子困風塵
就路還家觸處真
芳艸滿川桃李亂
風光全是故園春

正中來

石女翩翻鳥道飛
淵明琴上撫冰絲
緩歌劫外陽春曲
慢舞盤中白雪詞

兼中至

涇渭同流無間斷
華夷一統太平秋
而今水陸車舟混
何礙冰人跨火牛

兼中到

水窮山盡懸崖外
海角天涯雲更遮
撒手轉身人不識

迴途隨分納此此

太陽十六題

識自宗

拈花老子徒饒舌
面壁胡僧太賺人
更著洞山行過水
吾宗從此永沉淪

死中活

百尺竿頭須進步
無明鬼窟好抽身
寒灰定爆真奇味
枯木花開別是春

活中死

韶老須彌論過失
廬陵米價認商量
可憐一粒靈丹藥
嚥下喉嚨命已亡

不落死活

白雲深處有滄波
半醉微醒哭更歌
孤艇往來無繫絆
陰晴天氣曝漁蓑

背捨

人亡家破更何依
退步懸崖撒手時
去歲生涯無寸土

今年活計更忘錐

不背捨

通方大隱好居鄽
手段能如火裏蓮
九陌香塵烏帽底
一棹春水白鷗前

活分

垂衣端拱媿佳兵
文化優游致太平
昨夜濛濛春雨足
松筠花艸一時榮

殺人劍

雪刃森森倚碧雲佛魔凡聖總亡魂
水乾滄海魚龍死
火烈崑岡玉石焚

平常

寒來向火被添綿夏月臨風使扇便
渴飲飢食隨分過
閒中打坐困時眠

利道拔生

箇箇既知迦葉富人休怨釋迦慳
破鐺煮得空華實
甌裏盛將鐵漢飡

言無過失

元知舌上無橫骨須信喉中有轉關喚鼈為龜人不肯
直教迦葉也眉攢

透脫

瀟湘一片蘆花秋雪浪銀濤無盡頭何處漁歌發清響
鷺鷥飛出白汀洲

透脫不透脫

重陽九日菊花新妙契忘言不犯春收得安南憂伐北

不知何日得通津

稱揚

從來箇事不囊藏
利利塵塵為舉揚
近日令嚴誰敢犯
不教奪市與攬行

降句

鷲嶺默然全是影
毗耶杜口本非真
燈籠露柱呵呵笑
誤殺浮生多少人

又

疎山住住莫忽忽龍牙且無祖師意須信樸牛另有方
不犯鋒銳震天地

方又圓

破船折棹殘蓑笠石女直鉤波上月方士徒誇鐵作金
道人祇要金成鐵

西域嘗新瓜

西征軍旅未還家六月攻城汗滴沙自愧不才還有幸
午風涼處割新瓜

天德海上人寄詩用元韻

知子無心謁五侯浮雲富貴豈能留
華亭夜靜西風軟萬頃蒼波浸月鉤

寄白雲上人用舊韻

上人別後未能參一首新詩自北南
蕭寺深沉香火冷白雲閒鑠舊禪菴

武川摩訶院請為功德主

昔日南遊又五春馬蹄踏遍武川塵
而今却到經行處

且與摩訶作主人

和房長老二絕

只識瓶盤不識金
瓶盤釵釧本真金
一從打破疑團後
物物頭頭總是心


又

生死與涅槃都如昨
夢耳覺後笑呵呵
無彼亦無此

過平陽高庭英索詩強為一絕

一川秋色滿東籬
雁字行行自寫悲
試問省菴何所省

黃花紅葉總堪詩



湛然居士集卷七